

愚

齋

存

稿

愚齋存藁卷第六十九

電報四十六

唐少川侍郎來電

寄外部唐少川侍郎

外務部來電

張宮保來電

又

寄張宮保

又

寄成都錫清帥

愚齋存彙

卷六十九目錄

一
思補樓藏版

寄商部唐蔚之侍郎

寄長沙龐勍庵中丞

寄督周玉帥蘇撫陳筱帥

商部來電

寄商部

寄唐少川侍郎

皖撫恩新甫中丞來電

唐少川侍郎來電

北京張冶秋尙書來電

寄張冶秋尙書

寄長沙龐中丞籌振局司道

寄周玉帥

周玉帥來電

寄江甯周玉帥成都錫清帥安慶恩新帥揚州趙渭卿
都轉

粵督岑雲帥來電

寄岑宮保

寄廣州鄭陶齋觀察

寄北京外務部商部武昌張宮保江甯周玉帥南昌吳
仲帥

四川錫清帥來電

寄江甯周制台

粵督岑宮保來電

寄岑宮保

寄蘇撫陳筱帥

南昌吳仲懌中丞來電

外務部來電

南京周玉帥繼方伯來電

寄武昌張宮保長沙龐中丞

蘇撫陳筱帥來電

寄陳筱帥

湘撫龐勛帥來電

寄張宮保

又

張宮保來電

寄周玉帥繼方伯

安慶馮夢華方伯陳伯平廉訪卞柳門觀察來電

寄北京電政大臣楊京堂士琦

安慶馮方伯諸君來電

寄馮夢華方伯諸君

寄江甯端午橋制軍繼蓮溪方伯

寄端午帥

端午帥來電

寄端午帥

端午帥來電

寄東京楊星垣星使

寄外務部商部

外務部來電

端午帥來電

寄端午帥

贛撫吳仲帥來電

寄孫慕韓京兆

端午帥來電

寄江甯端制軍方奉天趙軍帥爾巽天津袁宮保世凱
武昌張宮保之洞成都錫制軍良廣州周制軍馥福州
崇制軍善蘭州升制軍允蘇州陳中丞夔龍杭州張中
丞曾敷安慶恩中丞銘南昌吳中丞重熹長沙岑中丞
春萼貴州龐中丞鴻書開封張中丞人駿濟南楊中丞
士驤太原恩中丞壽西安曹中丞鴻勛新疆聯中丞魁
桂林張中丞鳴岐北京鐵路大臣唐侍郎紹儀總理輪

電局楊丞堂士琦

寄北京稅務處鐵尙書唐侍郎

寄江甯端午帥繼方伯

寄甯端午帥鄂張宮保湘岑堯帥贛吳仲帥

寄張宮保

寄南昌吳中丞沈方伯

寄長沙岑堯帥

端午帥來電

愚齋存藁卷第六十九

電報四十六

唐少川侍郎來電

十月二十四日

儀奉 旨接辦滬甯以公安材難禦眾鑠如儀庸
陋膺此艱鉅益增悚惕邇因會議遼約暫難南行
希派一妥員將全路合同款目暨現在辦法一切
卷牘擇要迅卽帶京面呈該員何日起程望先電
示

寄外部唐少川侍郎

公接滬甯爲大局慶總管理處辦事樞紐所有合同帳

冊收付單據工程圖樣暨華洋一切函牘已飭總辦道員王勳擇要封固即日親自送京沈道敦和暫留候示以免路工停待總公司派員所設購地局滬錫一節已購齊錫甯一節正購未齊所有契據銀款總辦林道收支翁道刻正漏夜造冊一俟辦結當與文卷一併移交銀公司處亦已告知奉 旨改派後有工務逕請台端主政

外務部來電

十一月初一日並致呂吳兩大臣

據海參崴委員電稟歲有亂事華人房產燒燬殆盡損失甚重已由北洋派商輪海定前往救濟難

民並照會璞使向俄政府索賠尙未據復該埠華商猝遭亂事在船避難者約萬餘人情形困苦頃復據委員請款救急查滬埠素多善舉卽由貴大臣商同各紳在紅十字會及他義振項下酌撥鉅款俾資拯濟望速籌復爲盼

張宮保來電

十一月初八日

台旆東下未得走送悵歉手書奉到條復於後一錢道如交替後做處必委一差一京漢鐵路鄂省出力人員鄙意擬開單咨尊處歸路局彙保以免紛歧一漢口堡內之地前已議定辦法總之除官

地外凡所買民地鐵路公司與鄂省各半惟略有
曲折卽當詢明詳復速辦一大別山頂炸石開池
此事甚有窒礙請另籌辦法一自來水鐵管等件
自當訂用漢廠現與湘粵各紳議定粵漢三省鐵
路需用鋼軌一切鋼鐵等件均向漢廠訂購不得
向外洋購買自保利權俱已應允列入會議條款
此爲漢廠大利關繫至鉅自來水管等件爲款有
限隨時商酌

又十一月初九日

連日與湘粵諸紳議粵漢三省鐵路條款所有需

用鋼軌一切鋼鐵料鄙人囑其統向漢陽鐵廠訂購不得向外洋購買惟據粵紳云粵省運道略遠必須鐵料價目核與別廠相同方能遵用等語鋼鐵軌料各價只可與外洋各廠比較如係同價則必須用漢廠之物如此方易與眾紳商訂尊意如何祈飛速電示以便即日定議粵紳歸心甚急

寄張宮保

十一月初十日

京漢歷年所有漢廠軌件本照外洋運至中國之價目不能專顧商廠成本此商務通例請三省紳商放心定議水管係翻砂生鐵所鑄請留自辦並飭水局總辦與

李郎中訂一交貨付款合同以符商例水池壅礙已電廠矣

又十一月十三日

奉文電正擬面商鏡翁乃趙令又來力辭意甚決絕深堪敬佩竊念該令被屈十數年才具本優近來學養尤粹名譽漸著公愛惜人才莫如爲之設法揄揚使其名達九重藉資大用似勝於勞績附保但當代龍門現有專屬耳

寄成都錫清帥

十一月二十七日

徐牧壽茲在做處總理文案深資臂助現已奏准裁撤

向祇運漢口從不下運蘇皖產米沿江聚市於蕪湖仙
女廟內地聚市於無錫上海聞潯口青口等處向多偷
漏出洋近年屢豐存米究多尙未青黃不接何以價漲
至此其爲囤戶壟斷無疑查丁亥戊戌內地誤會官示
禁運出口爲禁運出境遂卽自議遏糴城鄉各不流通
滋事之案層見叠出今日情形更非昔比擬請電商大
府一面厲禁出洋嚴查偷漏一面飭司責成州縣迅將
祇禁出洋非禁出境之說切實聲明務令家喻戶曉勿
稍誤會滋事如湘省派員赴蕪購米係出境並非出洋
牧令係親民之官爲其權力所及認真與否立予賞罰

則各處米價必平有備或可無患等語海等察核所言切中事理洵爲目前急務海等僑寓滬上憂樂與共曷敢自安緘默爲此會同據以電聞敬祈察核飭司迅速辦理至所感盼仍乞電復

商部來電

閏四月十三日

本日本部會同戶部議奏閣學吳郁生奏籌款接濟滬甯摺奉 旨依議欽此查吳原奏稱按照合同所用各帳按三個月一次呈核轉咨存案本部戶部復奏稱滬甯路工從未具報其唐紹儀接收以前盛宣懷經手各款應令趕速詳報以重工款

又吳原奏稱請將萍醴歸商辦提撥官款接濟滬甯本部戶部復奏稱萍醴支撥官款建造以事前並未奏明立案礙難核銷於上年九月間奏明在案此路係官款修築應再行催將款目案由詳復再行奏明核辦原奏招商接辦一節應毋庸議各等語除咨達外先電聞希遵辦

寄商部

閏四月十五日

本年二月宣奏報交卸鐵路差使摺內聲明奉 旨改派後遵將滬甯一案移交唐紹儀接管除京漢外滬甯等路均未竣事所有已前各局員呈送華洋各冊譯算

單據悉數移交唐紹儀接辦造報免致紛歧奉 旨該部知道欽此曾鈔奏咨呈並接唐大臣移復滬甯接收清訖各有案應請貴部咨行唐大臣將滬甯工款彙總造報以符原奏至萍醴官款修築毋庸改歸商辦具徵維持官業體恤商艱至深紉佩此案先經奏奉 諭允嗣爲德美所持總公司不得已自籌自辦抵制洋款擴充官路一切案由業已詳晰咨復請俟到部俯賜奏明並核銷萍醴單冊俾清積案叩感無既

寄唐少川侍郎

閏四月二十三日

鐵廠視鐵路爲命脈去年奏派李郎中維格出洋研究

馬丁鋼煉法添購機爐現正趕緊裝配將次完工特已
咨請仍按照合同儘用廠料據李郎中稟正太工程司
來函定軌三千噸明年西五月起交每噸津交貨一百
七十五佛郎廠復函商加十佛郎尙未得復昨奉台端
電詢西四月能否交貨不誤路工已電復決不誤工弟
復查馬丁新爐工竣及交貨期限決不致誤請飭該工
程司迅速定議俾各省皆知北路並無更改且可知中
國鋼佳可用深感公誼

皖撫恩新甫中丞來電

閏四月二十四日並致呂大臣

前奉元電頃准大咨均悉皖米自粵湘同時告災

之後先知採買振米價遂飛漲安慶蕪湖每石六
千上下餘屬或七八千祁門建德則升米百文尙
無買處前聞江西禁米出省恐各處購米悉趨下
游蕪湖最喫重價昂將無底止旣慮貧民滋事又
恐紳民求封禁反與災區有礙特與玉帥筱帥熟
商電懇仲帥弛禁並擬將粵湘振米由蘇甯皖贛
分成認濟一律免釐不免稅請湘粵分給專照由
關卡填數蓋印驗放以杜影射嗣得仲帥復電贛
禁未能遽弛祇可將湘米由甯蘇皖三處分成攤
認粵米係出海由皖獨認昨已電請玉帥照前議

辦法公電湘粵得復卽由玉帥主稿聯名電奏尊處購米萬石運往衡州辦法須一律擬俟玉帥會奏定案再行奉達

唐少川侍郎來電

閏四月二十八日

濛電均轉飭正太復稱軌板零件俱照外洋時價運費在內尊議加價礙難照允交貨逾期酌議罰款如允請訂合同等語查原議係在津交貨計由津到石莊運費不貲鐵路運工程料物例得減價希向鄭道查算比較水陸運腳將水運改爲陸運由漢逕運石莊一轉移間鐵廠京漢正太均霑利

益希迅籌復

北京張治秋尙書來電

閏四月二十九日

湘省奇災聞公籌有協振鉅款感謝之至義振查放較爲切實現經電請貴同鄉唐廣文錫晉並由唐電招同志十六人自備資斧赴湘辦振兼由周玉帥陳筱帥准予委派公處之款應請專交唐君承領查放必能實惠及民曷勝顙禱希電復

寄張治秋尙書

閏四月三十日

尊電以義振較爲切實蓋義振必親查戶口專放極貧救人救溺非如官振祇憑造冊曾放其弊百出宣前在

直東親自辦過方知非嚴剔不能使極貧多霑實惠湘潭醴陵來電最早籌款二萬兩麵粉四千包由電局沈守兆棟等查放衡州官紳續電卽會同呂尙書等籌墊五萬兩麵粉六千包公舉會派王孝廉錫綬柳牧暹莊孝廉清華赴湘勸卹復電湘潭衡山已得滬商會劉紳鄂紳分散請往醴陵衡清等處譚道電衡陽清泉最重約八萬口已飭王錫綬等馳往查放此間捐款無多皆係借墊衡州求辦平糴已墊購蕪米萬石解往虧本皆認捐湘撫派李令宗璉購蕪米五萬石昨始得免稅釐旨可卽起運唐廣文錫晉如早來王柳等可不去今

款已盡數帶往勢難改撥聞災區不僅此難得妥人切
勿放過唐帶十六人亦不過放一兩縣可否電唐來滬
容與商會曾少卿等合商如能另湊一款另放一處最
好籌款固難得人尤難也

寄長沙麗中丞籌振局司道

五月二十一日

呂大臣

銑電所詢岳州至長沙水深若干尙未奉復頃該船商
探明只能到岳已罷論李令皓電現存蕪二萬餘石江
通二十四往裝約五千石直抵省愛仁二十二由漢放
蕪約裝一萬一千餘石仍到岳望卽預備過駁李令又
稱內地尙有二萬餘石有照無咨未能運出新帥來電

湘咨十二萬爲限現在江皖底田盡淹米價看漲衡州
官紳來電永屬亦缺糧則李令所購內地二萬餘石似
宜請尊處電咨新帥速放以免遲延

寄周玉帥

五月二十三日

衡永義振需米甚急除燕運一萬已免稅外頃由無錫
購到一萬石擬卽由滬僱輪並連麵粉直運湘潭乞卽
電飭滬關憑敝處護照免稅放行

周玉帥來電

五月二十四日並致呂大臣

上海現在禁米出口英續商約惟漕米軍米不在
禁列並未兼及振米約內有如淮無論何項米穀

載運出口則應視該禁業已廢弛若欲再行禁止則須另行出示之後以四十二日爲限方可照辦之語公熟諳約章是此項振米礙難由上海出口此米既係無錫所購似可由鎮江出口蓋由鎮江溯江上行乃內地往來非出海口請酌奪

寄江甯周玉帥成都錫清帥安慶恩新帥揚州趙渭卿都轉

接衡永譚道彭給諫等電衡又苦旱六月新穀難必饑民數十萬缺食尤急於索錢數旬內萬分緊迫永已因饑生變郴桂亦窘大局可危承購蕪米麵粉不敷尙鉅

求再購分批趕運來衡愈速愈妙南紳王錫綬等來電以沿途饑民乞食急不可待麵粉萬餘包已先散完頃又購一萬五千包運往前寄麵粉捐冊除蘇省已捐解外可否乞尊處酌助若干俾得添購續運功德無量

粵督岑雲帥來電 五月二十七日

商辦粵漢鐵路奉 旨迅速興工總工程司爲全路所繫賴必須慎選得人前據該公司總辦鄭道等請調詹道天佑袁宮保因以京張路事緊要未能飭令回粵鄭道等因思盧漢鐵路早告成績前辦該路之總工程司不知係聘用何國洋人月薪

若干擬求代爲招致來粵我公軫念大局於粵漢
路事尤所關懷務懇極力贊成以慰粵省官民之
望乞電復

寄岑宮保

六月初一日

粵漢路長工鉅竊恐學生閱歷太淺尙難其選實則自
已籌款辦理募用洋人必能由我主張與借款造路大
不相同昔年輪電局所用洋人頗有忠勤勝於華人者
鄭道知之盧漢總工程司沙多係比公司代僱其副總
工程司客臘威賽馬分辦南北兩路工竣俱已回國粵
路如僱洋員如客賽者最相宜弟從前因比小國工作

講究故舍大用小復多忌者聞鄂已延日人請公酌定薪水有等差如定見再查復

寄廣州鄭陶齋觀察

六月初四日

聞公總理粵路堅辭不獲事關大局務望勉力擔承總工程司優劣關係全工利鈍昨復雲帥洋員未嘗無忠勤者自款與借款不同洋員受僱不難駕馭盧漢比工程司客臘威初來月支薪水二千佛郎後加至二千五百佛郎不過合銀八百兩比薪較美薪大減似可用得惟鄂用日人不知南皮有異議否盧漢開辦章程當擇可用者鈔寄

寄北京外務部商部武昌張宮保江甯周玉帥南昌吳

仲帥

七月初六日

前因漢廠整理鐵政必須沿江多購鐵礦以供煅煉曾
於光緒二十五年三月札派冶局總辦解茂承帶領德
礦師斐禮會同九江電局委員汪承豫等勘得江西德
化縣屬金雞嶺城門又城門外三山名大勝門小勝門
等處產鐵均富堪供採煉行知九江關道札縣傳集業
主領價立契歸漢開採嗣緣議價未妥久未辦結本年
漢廠添設新爐需用礦石更多九江距漢甚近採運亦
易正派員續往圈購問訪聞有人擬將該處礦石售給

日商並擬援照冶礦合同辦理查二十五年漢廠與日本製鐵所訂立以煤易鐵合同第五款載明日本不得於大冶合同外另與中國他處及島地他人他礦另立買鐵石之約大冶亦不得將鐵石賣與在中國地方另設洋人有股之鐵廠二十九年續訂購運礦石預備礦價開辦漢陽新廠合同內第六款仍載明其餘續議條款仍照原合同辦理是九江鐵礦考之原案徵之合同中國鐵政局斷無放棄聽其轉售外人之理且漢廠深慮日本製鐵所魄力宏鉅有礙中國鋼鐵銷路故與張宮保再三核定大冶售鐵石額數每年不得過十萬噸

限制並與訂明不得另買他處鐵石所以保護中國鐵廠不使蹉跌防維甚切應請大部貴督部堂撫部院俯賜立案密電九江關道查案行縣禁止倘日使日領因此饒舌並祈查照前敘條款嚴切駁止一面仍由漢廠派員赴潯優給官價釘界立契藉保地產而興鐵政至紉維護仍祈賜覆

四川錫清帥來電

七月初七日並致呂大臣

潘道民表胞與殷懷峻詣篤行拯荒將及三十年全活何止百萬弟曾與晉邊共事深佩其人頃閱邸鈔在陝自盡久聞其因振積虧甚鉅日暮途窮

還以身殉可勝悼歎惟其生前善行若湮沒弗彰
何以勸善能否視嚴廣文例爲之表揚想東南諸
大善長早已議及如擬入告請挈敝銜

寄江甯周制台

七月初九日

呂大臣會電

湘省義振敝處選派義紳王錫綬等查放五州縣共放
現錢米麵合銀十三萬五千餘兩除各省募捐外不敷
二萬餘兩前蒙宥示湘省捐冊已飭發甯藩司籌勸俟
集有成數或另籌墊解良深感泐現據許道鼎霖段道
晉雲面稱徐屬水災邳宿睢最重銅蕭碭次之到滬擬
勸義振聞紳商之意非官先提倡殊難開辦敝處湘墊

尙未歸清尤難着手然值此公款艱窘自應互相通籌
擬請飭將甯藩司所募湘省捐冊所集成數若干先行
匯解改充徐州義振得公提倡當再籌墊若干一面電
湘調回義紳馳往徐屬擇尤查放段道云該處水未退
秋收無著爲日正長許道已面求尊處墊款平糶其無
錢糶米者情更急非義振不能救公視民如傷可否俯
允並將現籌辦法電示

粵督岑宮保來電

七月初十日

粵省各屬煤礦甚多擬先用土法試行開採萍鄉
煤礦所用中國工匠乞選派數人來粵又如有能

鍊錫礦之華工亦乞選派兩名前來感甚盼復

寄岑宮保

七月十四日

奉蒸電卽轉萍礦據張道等元電稱萍鄉土法挖煤工人有妙手惟恐遷地勿良且此等粗人必須有熟諳土法開礦之員友督率前往方妥應如何辦法乞電示遵至採鍊錫礦之華工萍本無人等語萍礦平直斜度不多故易挖遷地勿良似亦可慮

寄蘇撫陳筱帥

七月十五日

頃據堂姪在籍丁憂湖北候補道盛春頤常州來電稱忽有人在城鄉密布傳單捏稱叔父與春於十六日起

發米萬五千石洋萬五千元無論何等貧戶可至青果巷盛宅領取等語實堪駭異顯係有人希圖聚眾滋事恐釀巨禍應請台端電飭常州府陽湖縣迅速曉諭絕無其事一面嚴密查緝捏刊傳單人犯以靖地方實深感禱

南昌吳仲憚中丞來電

七月十五日

頃據九江王道電稟飭德化縣往查城門礦頃復並無匪人售給日人情事另稟等語先以電聞俟稟到再詳達

外務部來電

七月十七日

魚電禁止九江礦石售給日商係爲維持鐵廠起見本部自應准予立案如日使因此饒舌當切實駁阻

南京周玉帥繼方伯來電

七月十九日並致呂大

連日查湘振捐甯前已撥一萬運司四萬均已解至前發來麵粉捐冊因湘省米價已平湘電又不願收麵各屬勸捐重疊是以捐無成數現查有存洋一千餘元因要湊還湘振米價亦難轉撥徐海近聞徐海汪洋一片哀鴻遍野恐將流離焦慮萬分日前已據許久香等電請撥銀六萬辦糧平糶

已由司局墊發惟平糶不能救極貧現非辦急振
不可正與蘇撫甯藩等商籌若無款可撥懇兩公
與諸善士急辦義振以助官力之不足今年徐海
災聞爲四十年所未有乞大力設法至感至禱

寄武昌張宮保長沙龐中丞

八月初四日 呂大臣會電

江北圩田盡淹江南低區一概無收以致米價騰貴滬
價每石九元外蘇常揚鎮亦須六七元青黃不接民不
聊生據各處紳士籲請購米平糶以救目前昨南紳自
衡湘振畢歸來俱稱湘省秋收大稔米價大落每石不
過價錢三吊左右伏念湘災一經官紳籲告江南竭力

籌款籌糧不分畛域今不敢遽盼報施而移粟之舉本
屬兩益現擬墊款十萬兩公舉員紳馳赴湘潭購米五
萬石分運被災較重之區趕緊平糶如蒙俯允卽由敝
處咨請江蘇撫院給發護照辦理想台端痼癩在抱必
能俯如所請也伫盼電復無任感禱

蘇撫陳筱帥來電

八月初五日

本年蘇省江南北各屬水災饑民滿目非妥籌善
後不足以資安集而靖地方昨會玉帥電奏蒙

恩賞帑銀十萬兩並准將截漕蠲緩等事秋後奏
明請 旨惟爲日方長需款甚鉅奏內本聲明須

義紳募款協振想公情關桑梓必不漠視務請提倡辦理力拯災黎是所切禱

寄陳筱帥

八月初六日

江南北低區災重正在焦慮蒙大府奏請發帑並可截漕蠲緩感激莫名義振已成弩末旣荷諉誣當邀集同志或分辦或合辦俟籌定再奉達目前米價奇昂購米平糶爲第一急着南紳自湘返述湘大稔已電商張麗二帥請放米出口如復允卽咨請尊處援奏免稅給護照公舉員紳籌款往辦公當以爲然

湘撫龐帥來電

八月十一日

前此湘災渥蒙惠振鉅款今聞蘇省圩田被淹米
價騰貴湘雖勉助棉薄實爲抱歉承示擬派員給
照來湘購米十萬石自應通融查湘省當奇災之
後雖屬有秋尙未弛禁僅鄂省購米救荒米價已
較前漸漲現在市價在四串以外請飭承辦委員
陸續採辦免致市僧囤戶聞風居奇敝處當飭官
局查驗放行因會商湘紳是以稽答乞原

奇張宮保

八月二十日

周玉帥效電接袁慰帥電練兵處保薦李維格請派往
查閩廠囑弟處會委約期一月可回於鄂廠事亦無曠

誤除咨達並照委外特先電聞望公電李勸駕爲幸云
查漢廠正在安置鍊鋼機爐限年底完工因各路定貨
萬難延緩且該廠積欠洋債公款數百萬唐侍郎來電
正太鐵路存款百餘萬急須按月提還商部來文鐵路
總公司預支軌價九十餘萬官路定軌須扣二成外洋
定購化鐵大號爐機及橋版車廠機器均係李維格一
手經辦廠務緊急正在此時若一調動必致潰散斷非
外行生手所能代辦近來李維格頗有名譽上年徐菊
翁端午帥均欲調派出洋宣在京面懇以李維格工程
本領係在漢廠歷練而成廿八年奏派總辦鐵廠摺內

聲明鐵廠之成敗利鈍悉以付之用人之道必當用其所長尤當久於其任若用之不專或朝令暮改皆不足盡其才等語奉 旨允准咨明在案亦逆料中國用人輒多調動故難收效徐端聞而中止今慰帥玉帥委查閩廠雖僅一月爲期而漢廠安置全工便須停辦一月於閩未必有益漢廠則喫虧匪細且恐總辦一動諸債畢集變動難以逆料宣咯血未愈屢欲赴漢而不能安危大局所繫公似不能不問務求台端挈銜速電慰帥玉帥另委他員俾免貽誤不勝焦急跂禱之至此電並乞鈔送李郎中閱看李任事堅忍亦不願中途隳棄也

又 八月二十日

頃接李維格號電袁周兩帥電派格往查閩廠以一月
爲期突如其來不知用意所在惟如果閩廠能造師船
亦中國大事而我且多一大銷路此中關係甚鉅格已
復電允爲一往擬月初先甯後滬一切面稟云此事李
旣經允似難中止昨電只可不發擬卽電袁周兩帥堅
約一月爲限以後勿再調動容俟另擬呈覽

張宮保來電

八月二十一日

李即中行止關繫鐵廠安危祈速挈銜會電慰帥
王帥兩處由滬逕發

寄周玉帥繼方伯

九月初二日

前奉七月皓復電藉知麵粉捐款不能轉撥徐海並承
囑與諸善長急辦義振經與商會曾道等面商皆無以
應頃自蘇回奉二十八函及前事徐海地廣災徧蘇屬
壇溧宜荆及陽湖芙蓉圩災甚重皆須兼顧弟從前勸
捐輒數十萬皆賴各省輪電局之力本年湘振放款十
五萬零尙不能全數歸墊滙勢甚壞商會又難助力承
公與筱帥再三之屬擬免力勸墊派紳前往查放一面
分冊勸募只能擇極重三五縣開辦究竟何處最重災
狀何似官振如何辦法乞詳速電示方能措手

安慶馮夢華方伯陳伯平廉訪卞柳門觀察來電
九月初八日並致呂大臣楊京堂

皖北受全豫之水又爲山東徐州諸水所分注本年霪雨爲災眾流奔赴夏麥奪於垂成秋收艱於補種瞬交冬令積水未消中澤哀鴻嗷嗷待哺以宿靈五泗爲最重渦潁次之其皖南濱江水災較輕業蒙督撫兩憲附片專電一再奏陳准支十萬兩作振款欽遵辦理在案唯災廣款微不敷分布皖北民無蓋藏被災極苦風氣剛勁均與徐海相同仰懇一視同仁廣籌義振以拯災黎以遏亂萌

皖省幸甚大局幸甚

寄北京電政大臣楊京堂士琦

九月初九日

呂大臣

江南北水災甚重已公舉唐錫晉劉康遐柳暹等義振熟手分派徐海查放募款仍係弟等借重大名爲首已交輪局三十本電局百本公痾瘰在抱務懇電飭兩局總會辦員董加函分致俾資集腋以濟冬春兩振每一兩銀可救一民命

安慶馮方伯諸君來電

九月十一日並致呂尙書

照緒均蘇人泰蒙 恩量移皆不敢重皖輕蘇惟災況相同迫切求救俯懇兼收皖振登報勸募願

助皖振者歸皖感戴同深

寄馮夢華方伯諸君

九月十一日

呂大臣會電

皖蘇災況相同不勝扼腕遵當登報聲明願助皖振者
歸皖惟徐海等處登報勸募應者寥寥數不及萬有報
可稽義振紳董至今未能起程物力之艱一至於此爲
從來所未有皖振既亟似須另行設法以免貽誤

寄江甯端午橋制軍繼蓮溪方伯

九月十六日

呂大臣會電

江南北水災辱荷玉帥筱帥方伯諉誨協濟義振敢不
竭力現已籌墊銀六萬遴選義紳劉康遐等先擇徐海
重區查放向來義振以銀兌錢必有特別公益期可多

得錢多救命昨擬就清江兌換電商蔭帥覆電以浦局
銅元停鑄祇得改就甯換查今春湘振雁帥特允湘
平一兩易銅元一百七十枚今事同一律特委員解上
湘平銀六萬兩求照湘省兌價飭局照兌點交該委領
赴災區散放不特災民多救且使捐振者聞之尤爲愜
心公痾瘵在抱必能俯如所請禱切盼切

寄端午帥

九月二十日

呂大臣會電

承允義振款准以湘平銀一兩易銅元一百七十枚甚
感此項振銀湘平六萬兩乞詢司局如有應交滬道或
戶部銀行之款請卽電示尅日就近抵撥以免解費更

感現在募款難比登天竭蹶籌墊此數准卽由敝處照會劉紳康遐柳紳暹邵紳聞洛王紳繼善等分赴邳宿睢安四州縣前往查戶專擇極貧散放除咨達外請卽飛飭該四州縣妥爲照料明知杯水車薪無濟於事不過吾盡吾心水區未能種麥來日方長仍望多籌公款以期推廣各縣冬春兩振此間募款斷不足恃仁幷在望敢布腹心

端午帥來電

九月二十二日並致呂大臣

義擬湘平銀六萬兩請解交邇道作收江甯支應局應解賠款之項此間已飭支應局籌備湘平銀

六萬兩一俟劉紳等到甯卽行發交具領一面已
飛飭邳睢宿安等州縣切實照料以期周妥惟本
年災深地廣約計現時急振及將來冬春兩振需
款不下百萬 恩賞振捐及各省義助爲數有限
庫空如洗挪無可挪雖擬奏請截漕而不敷尙鉅
鄙人深知近來勸捐之難而目擊災情萬分焦急
不能不作將伯之呼公等向來樂善不倦而杏翁
又復桑梓情深務祈切商滬上諸大善士廣爲籌
助接續散放義振災民幸甚大局幸甚

寄端午帥

九月二十五日

湘平六萬已解漚道銅元已派柳紳邇來甯領解惟念
淮海徐奇災沿江沿湖洲圩民不聊生幸值福星蒞止
萬民有來蘇之望公款旣竭歷義捐尤不足恃只有實
官捐尙可收鉅款向來停捐之前輸將必旺此次改定
官制之後人皆知永不再捐踴躍當更非前比明知官
捐爲糝政然仕途純雜亦不在遲早兩月閒聞奉天實
官捐十月半停止公若奏請歸江南接辦至年底爲止
專辦淮海徐及沿江沿湖一帶災振當可全活百萬人
命如能派員勘估濬河修隄以工代振尤爲一勞永逸
昔年順直秦晉皆爲振濟特開實官捐今不過展期兩

月

兩宮惠愛黎元凡臣下所請振飢救災無不

俞允公聲光並茂爲民請命計無不准承公厚愛用敢
密陳

端午帥來電

五月二十六日

開寶官捐可集鉅款從權之論具見施濟熱忱惟
此次停捐內意甚爲堅決與往屆大不相同籲請
恐難照准且現當改定官制之初捐者未必踴躍
徒貽口實無補巨災現擬於原辦虛銜封典外奏
請加辦七項捐輸或可稍資挹注滬上義捐仍祈
一力主持以廣拯濟曾少卿能慨然往南洋一行

必能募得鉅款頃與子英商定由方誼函勸駕並
望公力懇慰之冀得當也

寄東京楊星垣星使

十月初二日

四大臣會電

日新稅則載諸國應享協定稅則利益中國不與獨抱
向隅前與小田切議商約曾與力爭彼諉爲須俟條約
期滿方能再議今邦交較前尤厚似可商改一律二十
二年條約載稅則十年期滿知照酌改今尙在六個月
期內尊處可否尅日知照酌改如以未奉外部訓條爲
疑亦請設法預爲地步雖未能卽定期開議庶不致失
此機會未知已電請部示否海等已電外商兩部矣

寄外務部商部

十月初二日

呂大臣李京堂會電

現查日本所定稅則載明應享協定稅則之利益各國
國名係奧比英法俄義墨和葡日耳曼巴西秘魯西班牙
牙美利加挪威瑞典瑞士丹麥暹羅諸國而中國不與
焉故華貨運往征稅獨重華商喫虧不少且相形實屬
難堪海宣前與小田切訂約時曾經力爭該領事諉爲
須俟二十二年條約期滿後方能再議現值振興商務
與彼邦交較前尤厚似可商與各國一律免分軒輊二
十二年條約載明此次所定稅則以十年爲限期滿六
個月知照酌改若未聲明更改仍照前辦等語現尙在

六個月期內可否請大部迅速照會日使並電楊使尅日知照酌量更改實於商務邦交大有關係就使更改不能卽定期內知照便可有望

外務部來電

十月初六日

冬電悉並准農工商部據長崎商會電咨呈前來自應與該國商改以卹商艱惟二十八年已訂新約未便仍以二十二年之約期滿爲詞且所爭是彼國進口稅與約載稅則亦無涉茲本部已照請日使轉達其政府允改與各國一律並電楊使設法磋商特聞

端午帥來電

十月十二日並致曾少卿施子英兩觀察

少卿函悉振款又得一萬甚善望交杏蓀宮保卽日撥解南洋之行少卿不能卽往三復函意似近諉卸殊與平生風義判若兩人至爲失望鄙意目前災深款絀非籌之各島富商終無以濟急難少卿義聞深入人心卽以瘡癘未宜無妨派一妥人代爲勸募事關百萬窮黎環而待命不憚再三之賁否翁子翁樂善之懷當亦力爲贊成也

寄端午帥

十月十三日

呂大臣會電

頃宣自蘇回滬奉真電南洋派人勸募容再與曾道熟

商另復茲又續交瑞道第二批湘平銀六萬兩請卽飭局預備銅元十萬二千串已備咨派員赴甯領運愈速愈妙前寄募啟務求作登高之呼俾收集腋之效凡收款按旬登列報章各省皆視尊處集交義振之款多寡以爲轉移若本省寂寥則外省呼籲更恐罕應海等承公諉誣不得不還以望諸台端唐教諭錫晉請速令回滬

贛撫吳帥來電

十月十七日並致呂大臣

贛省財政枯竭非廣闢地利不足以裕國厚民沈道瑞琳約有南潯資本家擬來贛勘驗山場礦產

洵屬難得贛產雖富此間紳民鮮能集資大舉而各國垂涎爭來勘視與其俟外人謀佔致滋交涉莫若招集華商資本家迅速勘辦利不外溢藉杜覬覦惟部意須俟勘定處所議有辦法籌集資本再行奏請開辦以免託諸空言沈道既有此意現在義約停議可否准飭沈道卽日約集同志速來勘驗具紉公誼如能有成公之賜也並祈電復

寄孫慕韓京兆

十月十八日

鋼鐵廠免稅一案承函示鐵公於漢廠事知我艱苦有意維持唐少翁所見甚大遂將定議候鐵公回京卽可

具奏頃一琴由閩回滬面稟免稅卽期滿如尙未辦請
公代求二公早日具奏以免稅司掣肘實紉公誼

端午帥來電

十月十八日並致呂大臣

徐淮義振蒙續籌湘平銀六萬兩惠澤博施有加
無已莫名感戴已飭局預備銅元十萬二千串一
俟委員到甯卽交領運募捐一事鄙人亟欲力爲
爲提倡前已將任內養廉按月全數助振截至停
振之日爲止其本署幕府委員及各局所學堂四
岸員司薪水修膳等項亦各捐助一成自本年冬
月起至明年三月止撥歸振款應用俾期集腋成

袞寄來募啟亦已加具切實文牘分發廣勸以濟
振需至各處紳富義捐仍望大力主持源源接濟
無任叩禱唐教諭已於十四日旋滬矣

寄江甯端制軍方奉天趙軍帥爾巽天津袁宮保世凱
武昌張宮保之洞成都錫制軍良廣州周制軍馥福州
崇制軍善蘭州升制軍允蘇州陳中丞夔龍杭州張中
丞曾敷安慶恩中丞銘南昌吳中丞重熹長沙岑中丞
春箕貴州龐中丞鴻書開封張中丞人駿濟南楊中丞
士驤太原恩中丞壽西安曹中丞鴻勛新疆聯中丞魁
桂林張中丞鳴岐北京鐵路大臣唐侍郎紹儀總理輪

電局楊丞堂士琦

十月二十日

呂大臣會電

前因江南北水災極重淮玉帥午帥筱帥函電屬辦義振以助官振之不足除由上海紳商籌銀十二萬兩易錢二十萬餘千及棉衣等項公舉義紳唐錫晉等八人分赴徐淮海揚鎮等處先擇最重之區極貧散放每口千錢約可救二十萬人命惟災民約逾百萬需款百萬方能普放海宣等公具募啟函懇各省大府援助計已仰邀洞鑒現值天寒急待鉅款接濟庶免轉乎溝壑上海一隅實已力竭昨蒙次山將軍匯到五千兩卽已轉發足活數千人命諸大帥惻隱爲懷不分畛域可否卽

求籌墊鉅款電匯上海廣仁堂辦振公所俾得及時分
派查放情同水火盼若雲霓再在滬各國官商教士邀
請海宣等會議據稱此次水災實非尋常各國均願捐
助擬設華洋公會湊捐等語公誼固難卻自辦更難緩
業經面告以 朝廷發帑各省大府均各協助鉅款本
省官振義振已並行矣郵函恐遲滯用敢馳電奉懇乞
賜示復急切待命之至

寄北京稅務處鐵尙書唐侍郎

十月二十一日

奉皓電鐵廠免稅蒙議准展限五年莫名欽感請卽飭
總稅務司轉行各關遵照頃接日本永瀧領事函稱本

國勅令略謂清國所出生熟鐵錫塊錫錠水銀等物進口稅則本年十二月起照各國協定稅則一律抽收惟關稅定率法所揭明之稅則較之協定稅則仍低則不在此例云謹附達

寄江甯端午帥繼方伯

十月二十日

呂大臣會電

頃接赴徐放振義紳韓景珪電稟珪到鎮揚見徐海饑民流離於途鎮約萬計揚約三萬飢寒露宿目不忍觀珪思既至該處放振則該民流離於途非但不能沐恩領振其苦更倍於鄉因商鎮紳急籌開辦粥廠尙乞恩酌接濟則徐海饑民同沾仁惠等語揚鎮饑民如此之

多聞皆不肯回籍流離可憫可否請專派大員赴揚鎮
兩處會同紳士趕辦粥廠其願回者寬給資斧給發聞
振歸來之護照僱船資送回籍以憑按口補振此聞義
紳寶已無暇兼顧乞復

寄甯端午帥鄂張宮保湘岑堯帥贛吳仲帥

十月二十
二日

頃據總辦萍礦兼代萍潭鐵路林道電稟醴陵拿獲匪
首萍鄉境內聚匪數千搶劫匪勢浩大路礦洋員甚多
通稟請派營隊扼紮諒已鑒核匪起倉卒尤恐地方痞
棍合串與路礦洋員爲難釀成巨案惟有請堯帥仲帥
電飭附近營隊星夜馳往會同萍醴營縣嚴拿爲首以

散脅從遲恐滋事

寄張宮保

十月二十二日

林道轉電想已覽張道箇電二十一匪聚數千人奪據
萍境上栗市盡用白旂書革命軍距萍礦甚近已將洋
人男女二十一名護赴長沙現在萍緊於醴江西調兵
不及已電堯帥連夜派兵赴萍尙恐以越境爲嫌務乞
飛電堯帥就近速派如能由尊處調精隊二百人乘小
輪至株洲由鐵路馳往萍境會勦必更神速乞示

寄南昌吳中丞沈方伯

十月二十二日

萍礦張道箇電今日匪聚數千奪踞萍境上栗市白旂

大書革命軍距萍城礦局皆近已將礦路洋員火車送往長沙現在情形甚急請電催撫帥派兵到萍會勦等語除電湘撫外但恐湘軍不肯越境務請尊處星夜就近派兵赴萍勦辦免釀大事速復

寄長沙岑堯帥

十月二十二日

去夏萍鄉滋事幸仗午帥在湘派營彈壓實因江西鞭長莫及此次匪類發自醴陵侵及萍鄉張道簡電已聚數千人奪踞上栗市盡用白旗書革命軍字樣務求速派營隊前往株洲卽乘火車赴萍將上栗市革命匪眾剿散遲必奪礦奪路已電飭行車總管趙主事與昌料

理乞電復

端午帥來電

十月二十二日

接林道電卽火急致堯帥速派兵鎮壓解散但長
沙省城新軍近多會黨不甚可恃萍醴鐵道尤恐
匪徒乘閒拆毀頃又電堯帥屬其注重鐵道爲第
一義堯帥精密度能了此也

愚齋存彙卷第六十九